

Wallensköld

I.

Au tens plain de felonnie,
d'envie et de traïson,
de tort et de mesprison,
sanz bien et sanz cortoisie,
et que entre nos baron
fesons tout le siecle empirier,
que je voi esconmenier
ceus qui plus offrent reson,
lors vueil dire une chanson.

II.

Li roiaumes de Surie
nos dit et crie a haut ton,
se nos ne nos amendon,
pour Dieu! Que n'i aions mie:
n'i ferions se mal non.
Deus aime fin cuer droiturier,
de teus genz se veut il aidier;
cil essauceront son non
et conquerront sa meson.

III.

Oncor aim melz toute voie
demorer el saint païs
que aler povre, chetis
la ou ja solaz n'avroie.
Phelipe, on doit Paradis
conquerre par mesaise avoir,
que vous n'i trouverez ja, voir,
bon estre ne geu ne ris,
que vous aviez apris.

IV.

Amors a coru en proie
et si m'en maine tout pris
en l'ostel, ce m'est a vis,
dont ja issir ne querroie,
s'il estoit a mon devis.
Dame, de qui Biautez fet hoir,
je vous faz or bien a savoir:
ja de prison n'istrail vis,

ainz morrai loiaus amis.

V.

Dame, moi couvient remaindre,
de vous ne me qier partir.
De vous amer et servir
ne me soi onques jor faindre,
si me vaut bien un morir
l'amors qui tant m'asaut souvent.
Adès vostre merci atent,
que biens ne me puet venir,
se n'est par vostre plesir.

VI.

Chanson, va moi dire Lorent
qu'il se gart bien outrement
de grant folie envaür,
qu'en lui avroit faus mentir!

- letto 550 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/wallensk%C3%B6ld-15>